

Na osnovu člana 12. Zakona o udruženjima i fondacijama Federacije Bosne i Hercegovine (Službene Novine FBiH, broj 45/02), osnivačka Skupština Udruženja „ AKCIJA GRAĐANA „, na sjednici, održanoj dana 3.9.2008. godine u Sarajevu, donosi:

STATUT

UDRUŽENJA „ AKCIJA GRAĐANA“

1. OSNOVNE ODREDBE

Član 1.

1. Udruženje „AKCIJA GRAĐANA“ jeste udruženje osnovano zajedničkom voljom i sporazumom osnivača – članova Udruženja, prikazanih u Zapisniku, a elaborirano Odlukom o osnivanju, usvojenoj na sjednici osnivačke Skupštine održanoj dana 15. augusta 2008. godine u Sarajevu, i sve u skladu s Zakonom o udruženjima i fondacijama Federacije Bosne i Hercegovine.

2.

Član 2.

Ovim Statutom, u skladu sa Zakonom, uređuje se:

1. Naziv i sjedište Udruženja;
2. Ciljevi i djelatnost Udruženja;
3. Zastupanje i predstavljanje Udruženja;
4. Organi Udruženja, njihove ovlasti, način imenovanja i opoziva, trajanje mandata, kovorum i pravila glasanja, uključujući i pitanja o kojima se odlučuje kvalificiranom većinom, funkciju osobe ovlaštene da saziva sjednice Skupštine;
5. Oblik i sadržaj pečata Udruženja;
6. Oblik i sadržaj znaka;
7. Sticanje i raspolaganje imovinom;
8. Način donošenja finansijskog izvještaja i izvještaja o radu;
9. Postupak za donošenje statuta, izmjena i dopuna statuta i drugih opštih akata Udruženja;
10. Uvjete i način učlanjenja, prestanak članstva, kao i prava, dužnosti i odgovornosti članova Udruženja;
11. Uvjete i postupak za pripajanje, razdvajanje, transformaciju ili prestanak rada Udruženja;
12. Pravila za raspodjelu preostale imovine u slučaju prestanka rada Udruženja.

2. NAZIV I SJEDIŠTE UDRUŽENJA

Član 3.

1. Puni naziv Udruženja na jezicima kojim se piše i govori u BiH je:

Udruženje „ **AKCIJA GRAĐANA**“

Удружење „ **АКЦИЈА ГРАЂАНА** „

Udruga „ **AKCIJA GRAĐANA** „

2. Skraćeni naziv Udruženja je: „ **AG** „

3. Puni naziv Udruženja službeno se koristi na latiničnom i ćirilichnom pismu.

Član 4.

Sjedište Udruženja „Akcija Građana“ je u Sarajevu (FBiH), na adresi: ulica Josipa Vencaša br. 32, Centar Sarajevo.

3. CILJEVI UDRUŽENJA

Član 5.

1. Udruženje „Akcija Građana“ je dobrovoljno, nezavisno, nevladino, nestranačko, nepristrasno, neprofitno, multietničko udruženje, osnovano radi ostvarivanja zajedničkih interesa članova Udruženja, a prije svih, da se kroz ovaj oblik udruživanja izvrši promocija građanskog društva u BiH unapređenjem teorije i prakse savremenih demokratskih procesa i principa izgradnje civilnog, multikulturalnog društva, vladavine prava, međunarodne integracije i saradnje.

Ciljevi i djelatnost Udruženja jesu:

- a. Promocija građanskog društva kroz unapređenje, međusobno poznavanje i saradnju cjelokupnog stanovništva Bosne i Hercegovine, s ciljem jačanja procesa demokratizacije i buđenja entuzijazma, naročito kod mlade generacije, za političke i društvene teme, te njihova priprema i obuka za nastavak aktivnosti na učešću u razvoju civilnog društva u BiH;
- b. Stalne aktivnosti na proširenju transparentnosti i odgovornosti u radu svih organa izvršne i zakonodavne vlasti u BiH, na svim nivoima;
- c. Prepoznavanje i ukazivanje na nesprovođenje aktuelnih zakonskih odredaba i aktivno učešće u zahtjevima za podnošenje odgovornosti za nastale propuste i štete, bilo institucija, bilo pojedinaca u institucijama;
- d. Prepoznavanje i ukazivanje na neodgovarajuće i nefunkcionalne zakonske odredbe i aktivno učešće u zahtjevima za izmjenama i dopunama takvih;
- e. Prepoznavanje i ukazivanje na zloupotrebe javnih ovlašćenja u privatne svrhe, ili druge interese, te vođenje aktivnosti na sprečavanju takvih zloupotreba;
- f. Prepoznavanje i ukazivanje na ugrožena ljudska prava pojedinaca ili grupa, te davanje prijedloga za poboljšanje stanja ljudskih prava u BiH, u cilju donošenja novih i izmjena postojećih propisa, te obrazovanje članova i svih građana BiH iz oblasti ljudskih prava;
- g. Pravna pomoć za sve kategorije stanovništva BiH, realizacijom stručnošću pojedinaca – članova Udruženja, ili animacijom drugih stručnih organizacija;
- h. Pravovremeno prepoznavanje narušenih i ugroženih socijalnih i životnih standarda, pojedinaca ili grupa, te aktivno učešće na davanju prijedloga na zaštiti standarda cjelokupnog stanovništva BiH, uz jasno ispoljavanje nezadovoljstva i javno izricanje zahtjeva za poboljšanjem, odnosno - pozivom na podnošenje odgovornosti;
- i. Kontaktiranje i istupi u medijima radi promocije ciljeva i djelatnosti Udruženja, kao i aktuelnog političkog, ekonomskog, socijalnog i stanja opšte sigurnosti građana BiH, te stanja svih aspekata ljudskih prava;
- j. Organiziranje, održavanje i aktivno učešće u javnim tribinama, edukaciji, treninzima, usavršavanju i obuci iz domena registrirane djelatnosti Udruženja;
- k. Objavljivanje izvještaja (redovno ili povremeno) u pisanom ili elektronskom obliku, i neprofitna publikacija (bilten Građanin), čiji se sadržaj odnosi na ciljeve, djelatnost i ostvarene rezultate iz aktivnosti Udruženja, na aktuelno političko, ekonomsko, socijalno, te stanje ljudskih prava u BiH, kao i promotivna, publicistička, audio i video produkcija, te druge slične aktivnosti;
- l. Saradnja sa drugim udruženjima, organizacijama i sličnim institucijama, iz BiH i izvan BiH, koji imaju sličan programski cilj, aktivnost i djelatnost;
- m. Obavljanje i drugih poslova u vezi sa sadržajem i ciljevima rada Udruženja.

4. NAČIN OSTVARIVANJA CILJEVA:

Član 6.

1. Utvrđene ciljeve Udruženje ostvaruje na način, određen Zakonom, ovim Statutom i drugim opštim aktima Udruženja, a prije svakog da:

- a. Prati rad i aktivnost organa izvršne i zakonodavne vlasti u BiH na svim nivoima, uočava greške i nedostatke, i pravovremeno izvještava i animira svo stanovništvo BiH o uočenim nedostacima, a organe vlasti proziva i poziva da nedostatke i greške otkloni;

- b. Organizira javne tribine, skupove građana, proteste, demonstracije i druge oblike iskazivanja građanskog nezadovoljstva s ciljem hitnog otklanjanja uočenih nedostataka i grešaka u izvršavanju Zakonom određenih obaveza svih nivoa izvršne i zakonodavne vlasti u Bosni i Hercegovini;
 - c. Svojim članstvom aktivno i punopravno učestvuje u svim oblicima iskazivanja građanskog nezadovoljstva;
2. U ostvarivanju svojih ciljeva Udruženje se neće uključivati u predizborne kampanje niti će na bilo koji način učestvovati u aktivnostima političkih stranaka.

5. ČLANOVI UDRUŽENJA

Član 7.

1. Članovi Udruženja mogu biti fizička i pravna lica koja prihvate ovaj Statut, i koja su spremna da svojim angažmanom, kroz djelovanja u tijelima Udruženja, doprinesu ostvarenju ciljeva na način prikazan u Statutu.

Fizička lica koja u vrijeme prijema u članstvo Udruženja nemaju navršenih 18 godina, dužna su dostaviti saglasnost jednog od roditelja, ili staratelja.

Osnivači stiču svojstvo člana Udruženja danom registracije Udruženja kod nadležne institucije FBiH.

2. Udruženje vodi Registar svojih članova. Skupština udruženja, a na prijedlog Upravnog odbora, donosi Pravilnik o Registru članova udruženja odmah nakon registracije Udruženja kod nadležne institucije FBiH.

Član 8.

1. Lica iz člana 7. stavova 1. i 2. ovog Statuta stiču pravo pristupanja Udruženju popunjavanjem obrasca zahtjeva, definiranog Pravilnikom o Registru članova Udruženja, čiji sastavni dio je i Izjava o prihvatanju ciljeva i Statuta Udruženja.

2. Pravna lica prilažu Odluku o podnošenju zahtjeva za prijem u članstvo Udruženja, donesena od strane nadležnog organa pravnog lica koje podnosi zahtjev.

Član 9.

1. Odluku o prijemu novog člana Udruženja donosi Upravni odbor na prvoj narednoj sjednici, shodno Pravilniku o registru članova Udruženja, a na osnovi prethodno evidentiranog zahtjeva za pristupanje u članstvo.

2. Protiv odluke Upravnog odbora o prijemu novog člana može se podnijeti prigovor. Prigovor se smatra legitimnim ako je u njegovom donošenju učestvovalo najmanje 2/3 od ukupnog broja članova Udruženja.

Član o kojem se izjašnjava Skupština može učestvovati u donošenju prigovora.

Prigovor se podnosi Skupštini Udruženja u roku od osam (8) dana od dana uručenja odluke. Pravovremeno podneseni prigovor odlaže prijem novog člana u Udruženje.

3. Na osnovi pravovremeno podnesenog progovora, Skupština Udruženja dužna je odgovoriti u roku do 15 dana od dana podnošenja prigovora.

4. Član Udruženja koji je ranije isključen iz Udruženja, gubi pravo ponovnog uključivanja u članstvo Udruženja.

Član 10.

1. Članstvo u Udruženju prestaje:

- a. Svojevoljnim istupanjem iz Udruženja;
- b. Neplaćanjem članarine duže od šest (6) mjeseci u kontinuitetu;
- c. Povredom odredaba Statuta i drugih opštih akata Udruženja;
- d. Prestankom pravnog subjektiviteta člana;
- e. Smrću člana Udruženja.

2. Odluku o prestanku članstva zbog povreda Statuta donosi Upravni odbor Udruženja.

Član 11.

1. Svaki član Udruženja može svojevolarno istupiti iz Udruženja na osnovu pisane izjave o istupanju koju dostavlja Upravnom odboru Udruženja.
2. Kao dan prestanka članstva smatraće se datum prijema izjave o istupanju.

Član 12.

1. Član koji grubo krši Statut Udruženja, ne izvršava svoje obaveze prema Udruženju, definirane članom 15. ovog Statuta, ili svojim postupcima na drugi način šteti ili narušava ugled Udruženja, može biti isključen iz Udruženja.

Prije donošenja Odluke o isključenju, član Udruženja mora biti obaviješten u pisanoj formi putem prijedloga za isključenje, kao i razlozima zbog kojih se isključenje predlaže.

Članu Udruženja se mora ostaviti rok od osam (8) dana od dana prijema prijedloga za isključenje, u kojem se može izjasniti o pokrenutom prijedlogu.

Ukoliko se član ne izjasni u pisanom obliku, ili javno, osobno pred članovima Upravnog odbora, smatraće se da je saglasan sa Odlukom.

Ukoliko je članu Udruženja, iz bilo kojeg razloga, nemoguće uručiti prijedlog za isključenje, nakon proteka roka od osam (8) dana od dana donošenja prijedloga, isti će se smatrati isključenim, a o razlozima isključenja će biti obaviještena Skupština Udruženja.

Odluku o isključenju donosi Upravni odbor.

Protiv odluke Upravnog odbora kojom se član isključuje iz Udruženja, u roku od osam (8) dana od dana donošenja Odluke može se izjaviti prigovor Skupštini Udruženja.

Prigovor može izjaviti isključeni član, kao i drugi članovi Udruženja, ukoliko ostvare legitimitet od 2/3 ukupnog broja članova Udruženja

1. Odluka Skupštine Udruženja je konačna, i protiv nje nije dozvoljena žalba.

Član 13.

1. Članstvo u Udruženju prestaje pravnom licu - članu Udruženja, gubitkom njegovog svojstva pravnog lica, na dan upisa prestanka svojstva u Registar kod nadležnog suda.

Prestankom članstva prestaju i sva članska prava i obaveze u Udruženju.

Član 14.

1. Član Udruženja koji istupi ili je isključen iz Udruženja dužan je izvršiti sve finansijske i materijalne obaveze prema Udruženju, dospjele do dana prestanka članstva.

Član 15.

1. Članovi Udruženja imaju sljedeća prava i obaveze:

- a. Da učestvuju u ostvarivanju ciljeva Udruženja;
- b. Da biraju i budu birani u organe Udruženja;
- c. Da budu redovno i blagovremeno obaviješteni o aktivnostima Udruženja;
- d. Da iznose mišljenje i prijedloge u cilju unapređenja rada Udruženja;
- e. Da koriste prava u skladu sa ovim Statutom i drugim normativnim aktima Udruženja;
- f. Da uredno plaćaju članarinu;
- g. Da čuvaju i podižu ugled Udruženja;
- h. Da ostvaruju druga prava i dužnosti utvrđene ovim Statutom i opštim aktima Udruženja

Član 16.

1. Članovima Udruženja „Akcija Građana“ dozvoljeno je članstvo i angažman u drugim udruženjima i sličnim organizacijama, koje u svom programskom cilju i zadacima nemaju aktivnosti suprotne načelima ovog Udruženja.

2. Članovima Udruženja „Akcija Građana“ dozvoljeno je članstvo i angažman u političkim organizacijama, bilo da su te organizacije političke stranke na vlasti ili u opoziciji.

3. Članovima Udruženja koji su ujedno i članovi političkih organizacija, zabranjuje se proklamiranje idejnih ciljeva i zadataka političkih organizacija kroz aktivnost Udruženja.

Za člana za kojeg se ustanovi da grubo narušava uvjete iz prethodnog stava ovog člana, biće odmah pokrenut prijedlog i postupak za isključenje iz članstva Udruženja.

Član 17.

1. Osnivači Udruženja, donatori i ostali članovi Udruženja mogu, u slučaju izuzetnih zasluga i doprinosa u afirmaciji Udruženja, dobiti i priznanje Udruženja.

Odluku o dodjeli priznanja donosi Upravni odbor Udruženja, a priznanje potpisuje predsjednik Skupštine.

6. ORGANI UDRUŽENJA

Član 18.

1. Organi Udruženja su:

- a. Skupština,
- b. Upravni odbor,
- c. predsjednik Skupštine,
- d. Sud časti.

Skupština Udruženja

Član 19.

1. Skupština Udruženja je najviši organ Udruženja, koju čine 1/3 od ukupnog broja članova Udruženja. Skupštinu Udruženja biraju svi članovi tajnim glasanjem. Mandat Skupštine Udruženja određuje se na 12 mjeseci.

2. Skupštinu Udruženja čine svi njeni osnivači.

Član 20.

1. Skupština Udruženja nadležna je da:

- a. Donosi statut, izmjene i dopune statuta i druge akte određene statutom;
- b. Daje saglasnost na pravne radnje poduzete u postupku utemeljivanja Udruženja;
- c. Bira i opoziva članove Upravnog odbora, predsjednika Skupštine, potpredsjednika Skupštine;
- d. Razmatra i usvaja program rada Udruženja;
- e. Razmatra i usvaja izvještaje koje je pripremio Upravni odbor;
- f. Vršiti nadzor nad namjenskim korištenjem i raspolaganjem sredstava Udruženja,
- g. Odlučuje o udruživanju u saveze, pripajanju, razdvajanju, transformaciji, prestaku rada i drugim statusnim promjenama Udruženja;
- h. Donosi odluku o dodjeljivanju nagrada, pohvala i priznanja Udruženja;
- i. Utvrđuje iznos članarine;
- j. Usvaja budžet Udruženja,

- k. Razmatra i usvaja prigovore i žalbe članova Udruženja na odluke Upravnog odbora;
- l. Odlučuje o svim pitanjima koja nisu u nadležnosti drugog organa.

Član 21.

1. Skupština Udruženja sastaje se po potrebi, a najmanje jedanput u šezdeset (60) dana. Skupštinu saziva predsjednik Skupštine najmanje sedam (7) dana prije njenog zasjedanja. Predsjednik je dužan sazvati Skupštinu i u slučaju kada to zahtijeva najmanje jedna trećina (1/3) članova Skupštine, ili kada to zatraži Upravni odbor. Skupština ima kvorum za rad ako Skupštini prisustvuje više od polovine ukupnog broja članova.
2. Skupština odlučuje nadpolovičnim brojem glasova prisutnih članova. Član Udruženja o kojem se Skupština izjašnjava glasanjem, nema pravo izjašnjavanja.

Član 22.

1. Skupština bira predsjednika i jednog potpredsjednika Skupštine. Predsjednik Skupštine se bira na period od jedne (1) godine, uz mogućnost jednog (1) reizbora. Predsjednik Skupštine Udruženja saziva sjednice Skupštine, predsjedava sjednicama i stara se o sprovođenju odluka koje donosi Skupština. Za svoj rad odgovara Skupštini. Potpredsjednik Skupštine pomaže predsjedniku u vršenju poslova iz njegove nadležnosti. Potpredsjednik se bira na period od 1 (jedne) godine sa mogućnošću reizbora za još samo 1 (jednu) godinu.
2. Predsjednik Skupštine obavlja slijedeće zadatke:
 - a) Saziva sjednice Skupštine i predsjedava sjednicama;
 - b) Potpisuje akte i odluke i druge pisane dokumente iz nadležnosti Skupštine Udruženja;
 - c) Osigurava zakonitost u radu Udruženja;
 - d) Obavlja i druge poslove u skladu sa ovim Statutom.
3. U slučaju spriječenosti, predsjednika Skupštine može zamijeniti redom: potpredsjednik Skupštine, predsjednik Upravnog odbora, član Skupštine kojeg on odredi. Predsjednik mora dati pismeno obrazloženje i ovlasti na koga prenosi svoju funkciju.

Član 23.

1. Bliže odredbe o načinu rada Skupštine, glasanju, odlučivanju, upućivanju poziva za sjednice i drugim pitanjima od značaja za rad Skupštine definiraju se Poslovnikom o radu Skupštine Udruženja.

Upravni odbor Udruženja

Član 24.

1. Upravni odbor je izvršni organ Skupštine.

Član 25.

1. Upravni odbor ima zadatke i obaveze da:
 - a. Priprema sjednice Skupštine;
 - b. Priprema i predlaže nacrt izmjena Statuta i drugih akata koje donosi Skupština;
 - c. Provodi politiku, zaključke i druge odluke koje je donijela Skupština;
 - d. Upravlja imovinom Udruženja;

- e. Prati realizaciju finansijskog plana rada Udruženja i donosi odluke o upotrebi sredstava;
- f. Podnosi Skupštini Udruženja godišnje ili periodične izvještaje o svom radu;
- g. Bira, imenuje i razrješava članove komisija – odbora i radnih tijela, delegate Udruženja u organima upravljanja, asocijacijama privrede, drugim udruženjima i drugim forumima;
- h. Vršiti i druge poslove predviđene Statutom i odlukama Skupštine.

Član 26.

1. Upravni odbor čine predsjednik, zamjenik predsjednika i pet (5) članova koje bira i razrješava Skupština Udruženja na period od jedne (1) godine, sa mogućnošću samo jednog (1) ponovnog izbora.

2. Upravni odbor sastaje se po potrebi, a najmanje jednom (1) mjesečno. Upravni odbor ima kvorum ukoliko je prisutno više od polovine članova, a odluke donosi nadpolovičnim brojem glasova prisutnih članova.

Član 27.

1. Predsjednika Upravnog odbora Udruženja bira Skupština.

Mandat predsjednika Upravnog odbora je jedna (1) godina, s tim da ponovo može biti izabran na istu dužnost, ali samo jedanput (1). Funkcija predsjednika Upravnog odbora je volonterska.

2. Zamjenik Upravnog odbora se bira na 1 (jednu) godinu sa mogućnošću reizbora za još samo 1 (jednu) godinu.

Član 28.

1. Predsjednik Upravnog odbora Udruženja obavlja slijedeće poslove:

- a. Saziva sjednice Upravnog odbora i predsjedava sjednicama i stara se o izvršenju odluka iz nadležnosti Upravnog odbora;
- b. Predstavlja i zastupa Udruženje u pravnom prometu, predstavlja Udruženje u javnosti i razvija saradnju sa drugim udruženjima i ustanovama;
- c. Potpisuje sva finansijska dokumenta;
- d. Priprema i predlaže planove i programe rada Udruženja;
- e. Učestvuje u uspostavljanju i razvoju saradnje sa drugim organizacijama, udruženjima i ustanovama;
- f. Potpisuje sve akte i odluke i druge pisane dokumente iz nadležnosti Upravnog odbora;
- g. Obaviještava javnost o radu i rezultatima rada Upravnog odbora;
- h. Obavlja i druge poslove u skladu sa zaključcima i nalogima Skupštine i Upravnog odbora Udruženja.

Član 29.

1. Predsjedniku i članovima Upravnog odbora može prestati mandat i prije isteka redovnog roka:

- a. Ostavkom na članstvom,
- b. Opozivom.

2. Inicijativu za opoziv člana Upravnog odbora može dati jedna trećina (1/3) članova Skupštine ili predsjednik Skupštine Udruženja.

3. U slučaju opoziva nekog od člana Upravnog odbora, Skupština na istoj sjednici imenuje drugu osobu na to mjesto u Upravnom odboru.

Član 30.

1. Upravni odbor je za svoj rad odgovoran Skupštini Udruženja i obavezno je da joj podnosi izvještaj o radu najmanje jednom godišnje.

7. IMOVINA UDRUŽENJA I KORIŠTENJE I RASPOLAGANJE IMOVINOM

Član 31.

1. Imovinu Udruženja čine: prava, stvari i novac koje Udruženje stiče u skladu sa zakonima u BiH, i ovim Statutom.

Za obaveze prema trećim licima, Udruženje odgovara cjelokupnom imovinom.

Član 32.

1. Udruženje može sticati sredstva iz sljedećih izvora:

- a. članarine;
- b. doborovoljnih prihoda i poklona fizičkih i pravnih lica;
- c. sredstava dodjeljenih iz budžeta;
- d. prihoda od kamate, dividendi, dobiti od kapitala, zakupnina, honorara i sličnih izvora pasivnih prihoda;
- e. prihoda stečenih obavljanjem privredne djelatnosti;
- f. drugih prihoda stečenih u skladu sa Zakonom i Statutom;

Član 33.

1. Udruženje ne može primati finansijska ili materijalna sredstva, kao ni prihvatati bez naknade uslugu, ni od jedne političke organizacije u zemlji ili svijetu. Sva sredstva evidentirana na računu Udruženja, a porijeklom od političkih organizacija, biće odmah vraćena pošiljaocu, a o tome odmah obaviještena Skupština Udruženja.

Član 34.

1. Udruženje može obavljati privrednu djelatnost u skladu sa Zakonom, a radi ostvarivanja ciljeva utvrđenih u članu 5. ovog Statuta.

Za obavljanje neposredne privredne djelatnosti, odnosno djelatnosti koja nije vezana sa ciljevima Udruženja, može se formirati posebno pravno lice u skladu sa važećim zakonskim propisima u BiH.

Član 35.

1. O sticanju prihoda, korištenju imovine i raspolaganju sredstvima Udruženja, odlučuje Upravni odbor u skladu sa ovim Statutom i opštim aktima Udruženja.

Član 36.

1. Udruženje je dužno uredno voditi poslovne knjige u skladu sa prihvaćenim računovodstvenim principima i sastavljati finansijske izvještaje, saglasno važećim propisima.

Član 37.

1. Upravni odbor je dužan, najmanje jedanput godišnje, podnijeti Skupštini Udruženja izvještaj sa podacima o finansijsko-materijalnom stanju Udruženja, korištenju imovine, prihodima i rashodima Udruženja i drugim pitanjima od značaja za raspolaganje imovinom i za finansijsko poslovanje Udruženja, a na zahtjev Skupštine Udruženja dužan je podnijeti izvještaj i prije isteka jednogodišnjeg perioda.

Član 38.

Predsjednik Upravnog odbora je ovlašten da propisuje akte koji se odnose na sticanje i raspolaganje imovinom Udruženja i na finansijsko poslovanje.

Član 39.

1. Svaki član Udruženja ima pravo da ostvari uvid u poslovne knjige i drugu dokumentaciju u vezi sa imovinom i finansijskim poslovanjem Udruženja.
2. Ostvarivanje prava iz prethodnog stava dužan je osigurati Upravni odbor, a najkasnije osam (8) dana od dana prijema pisanog zahtjeva člana Udruženja.

8. JAVNOST RADA

Član 40.

1. Rad Udruženja je javan.
Javnost rada Udruženja ostvaruje se na način utvrđen Zakonom i ovim Statutom.

Član 41.

1. Organi Udruženja su dužni da ovlaštenim predstavnicima sredstava informisanja učine dostupnim podatke, informacije i isprave koje se odnose na rad Udruženja.
2. Predstavnici sredstava informisanja imaju pravo da prisustvuju sjednicama organa Udruženja i da izvještavaju o radu tih organa.

Član 42.

1. Članovi Udruženja imaju pravo da budu redovno informisani o radu svih organa Udruženja.

Član 43.

1. Izuzetno, opštim aktom, koji donosi Upravni odbor može se utvrditi da pojedine informacije, podaci i isprave predstavljaju poslovnu tajnu i kada se razmatraju bez prisustva javnosti.
Istim aktom mogu se utvrditi odgovorna lica za korištenje i zaštitu informacija koje imaju karakter poslovne tajne.
2. Za poslovnu tajnu ne mogu se odrediti podaci koji su javni po Zakonu i drugim propisima, kao i podaci o kršenju Zakona i drugih propisa.

9. OBLIK I SADRŽAJ PEČATA UDRUŽENJA

Član 44.

1. Udruženje ima samo jedan svoj pečat. Za čuvanje i upotrebu pečata zadužuje se predsjednik Upravnog odbora.
2. Pečat Udruženja je okruglog oblika, promjera 30 mm, sa prikazanim logotipom u sredini, i tekstualnim ispisom „Udruženje Akcija Građana“, u gornjoj polovini kruga.
3. Udruženje ima i svoj logotip, prikazan u dvije boje: crvenoj, kojom su obilježena dva slova: „AG“, i crno bojenim tekstom „akcija građana“ pisanim ispod slova „AG“.
4. Logo je u obliku trokuta prekinutog u donjem dijelu, crvene boje.
5. Ispod loga velikim slovima piše AKCIJA (crna boja) GRAĐANA (crvena boja).



10. PREDSTAVLJANJE I ZASTUPANJE UDRUŽENJA

Član 45.

1. Udruženje u komunikaciji i odnosima sa drugim organizacijama, državnim organima i drugim institucijama, predstavlja predsjednik Skupštine.

Udruženje, u administrativno-tehničkoj podršci, neophodnoj za ispravno funkcioniranje Udruženja, mogu servisirati i druga lica koja sa Udruženjem, na osnovama internog ili javnog konkursa, ugovore profesionalni odnos na radno mjesto tehničkog sekretara.

Administrativno-tehnički sekretar za svoje poslove odgovara Upravnom odboru, koji odlučuje o zasnivanju, ili prekidu ugovora o radnom odnosu.

Član 46.

1. Udruženje u finansijsko-materijalnom prometu zastupa predsjednik Upravnog odbora.

2. U poslovima, kojima se otuđuju ili opterećuju nepokretnosti Udruženja, ili se za Udruženje stvaraju finansijske obaveze u iznosu većem od 1.000 KM, predsjednik Upravnog odbora je dužan pribaviti prethodnu suglasnost Upravnog odbora i predsjednika Skupštine Udruženja.

Predsjednik Skupštine Udruženja o takvoj aktivnosti dužan je odmah, a najkasnije u roku od osam (8) dana, sazvati Skupštinu Udruženja, koja će od Upravnog odbora zatražiti izvještaj o konkretnoj aktivnosti.

Član 47.

1. Udruženje u javnosti i odnosima sa medijima može predstavljati član Udruženja (glasnogovornik), koji ima pravo prisustva svim sjednicama i svim aktivnostima bilo kog organa Udruženja, ali nema pravo glasa, izuzev na sjednicama u kojima prisustvuje kao delegirani član u to tijelo. Član koji predstavlja Udruženje u javnosti i odnosima sa medijima mora imati visoke moralne standarde, i za svoje izjave i postupke odgovara Skupštini, koja ga postavlja i razrješava dužnosti.

2. Mandat člana, koji Udruženje predstavlja u javnosti i u odnosima sa medijima, traje jednu (1) godinu, s mogućnošću ponovnog biranja neograničeno puta.

Član 48.

1. U postupcima u kojima Udruženje učestvuje kao stranka radi ostvarivanja svojih prava, dužnosti i odgovornosti pred nadležnim državnim organima, predsjednik Skupštine Udruženja može dati pisanu punomoć za zastupanje advokatu ili drugom stručnom licu – zakonskom zastupniku.

11. USLOVI I POSTUPAK ZA PRIPAJANJE, RAZDVAJANJE, TRANSFORMACIJU ILI PRESTANAK RADA UDRUŽENJA

Član 49.

1. Udruženje se može pripojiti drugom udruženju. Udruženje „Akcija Građana“ može pripojiti drugo udruženje.

Udruženje se ne može razdvojiti na dva ili više udruženja.

Udruženje se može transformirati u udruženje od javnog interesa.

Član 50.

1. Odluku o pripajanju ili transformaciji donosi Skupština Udruženja na prijedlog Upravnog odbora i predsjednika Skupštine.

Član 51.

1. Odluka iz predhodnog člana Statuta smatra se usvojenom kada je na sjednici Skupštine prihvatiti više od tročetvrtinskog ($\frac{3}{4}$) broja svih članova Udruženja.

Član 52.

1. Udruženje može prestati sa radom dobrovoljno ili po sili zakona.

2. Udruženje prestaje sa radom dobrovoljno, a na prijedlog predsjednika Udruženja, podržanog od najmanje dvotrećinskog broja ($\frac{2}{3}$) članova Udruženja, ako o tome, najmanje tročetvrtinskim ($\frac{3}{4}$) brojem glasova odluče osnivači Udruženja, prikazani u članu 2. Odluke o osnivanju Udruženja.

3. Ako, u vrijeme odlučivanja o dobrovoljnom prestanku rada Udruženja, u aktivnom članstvu više nema osnivača iz Odluke o osnivanju, ili ih ima najviše dva (2), tada odluku o prestanku rada Udruženja donosi glasanjem najmanje tročetvrtinski ($\frac{3}{4}$) broj članova Udruženja.

Ova Odluka ne podliježe pravu žalbe.

12. PRAVILA ZA RASPODJELU PREOSTALE IMOVINE U SLUČAJU PRESTANKA RADA UDRUŽENJA

Član 53.

1. Istovremeno sa odlukom o dobrovoljnom prestanku rada Udruženja, Skupština donosi plan likvidacije Udruženja, kojim se utvrđuje raspored imovine, prava i obaveze Udruženja.

Skupština imenuje likvidatora Udruženja, čija je dužnost da se stara o izvršenju plana likvidacije, i koji je ovlašten da zastupa Udruženje u postupku likvidacije, kao i u podnošenju zahtjeva za prijavu prestanka rada Udruženja nadležnim organima.

Član 54.

1. U postupku likvidacije Udruženja iz imovine Udruženja izmiriće se sve zakonske obaveze, kao i obaveze nastale prema drugim povjeriocima Udruženja, a eventualna preostala imovina rasporediće se na članove Udruženja srazmjerno njihovom učešću u njenoj nabavci.

13. POSTUPAK ZA DONOŠENJE STATUTA, IZMJENA I DOPUNA STATUTA I DRUGIH OPŠTIH AKATA UDRUŽENJA

Član 55.

1. Osnovni akt Udruženja je Statut.

2. Opšti akti Udruženja jesu:

- a. Pravilnici,
- b. Odluke,
- c. Poslovnici.

Opšti akti moraju biti saglasni Zakonu o udruženjima i fondacijama BiH i drugim važećim zakonima u BiH, kao i Statutu Udruženja.

3. Pojedinačni akti jesu:

- a. Odluke,
- b. Rješenja,
- c. Zaključci,
- d. Uputstva i
- e. Mišljenja.

Član 56.

1. Opšti akti Udruženja donose se u slučajevima kada je to izričito utvrđeno Zakonom, Statutom kao i u drugim slučajevima kada se na opšti način uređuju pitanja od značaja za ostvarivanje ciljeva Udruženja.

Član 57.

1. Na sastancima organa upravljanja Udruženja i njegovih komisija - odbora obavezno se sačinjavaju zapisnici.

Zapisnici moraju biti istiniti i moraju tačno održavati bitan tok rada i suštinu svih donijetih odluka i stavova. Zapisnici moraju biti potpisani.

2. Ukoliko nije ranije određen, imenovanje zapisničara donosi predsjednik organa koji vodi sjednicu.

Član 58.

1. Inicijativu za izmjene i dopune Statuta može podnijeti svaki član Udruženja.

Inicijativa se podnosi Upravnom odboru, u pisanom obliku, i uz odgovarajuće obrazloženje.

Član 59.

1. Prijedlog za izmjene i dopune Statuta utvrđuje Upravni odbor.

Utvrđeni prijedlog predsjednik Upravnog odbora dostavlja Skupštini Udruženja, u pisanom obliku i uz odgovarajuće obrazloženje, u roku od trideset (30) dana prije održavanja sjednice Skupštine.

Član 60.

1. O izmjenama i dopunama Statuta odlučuje Skupština, glasanjem najmanje dvotrećinskom (2/3) većinom glasova ukupnog broja članova Udruženja.

Član 61.

1. Predsjednik Skupštine potpisuje odluke o izmjenama i dopunama Statuta, koje se smatraju originalima i čuvaju se u arhivi Udruženja.

14. PRIJELAZNE I ZAVRŠNE ODREDBE

Član 62.

1. Ovaj Statut stupa na snagu danom usvajanja na Osnivačkoj skupštini Udruženja, a primjenjivaće se od dana upisa Udruženja u Registar kod nadležnog Ministarstva Federacije BiH.

Predsjednik Skupštine

Berina Hamzić